

er nun gen Ertford kam da dan auch ein mercklich grosse vnd berümpfte vniuersitet ist. Da selb schlug Vlen Spiegel sein brieff auch an, vnd die collegaten der vniuersitet, hetten vil gehört von seinen 5 listen, Vnd ratschlugen, was sie im fürgeben möchten, Vff das es inen nit gieng wie den von Brag mit im gangen was, vnd mit schanden bestanden Nun warden sie zu rat, das sie Vlen Spiegel ein Esel in die leer thun wolten, dan es sein vil Esel zu Erdtsfurt alt und iung.

10 Sie besantent vlen Spiegel vnd sprachen zu im, magister ir hon kunstliche brieff an geschlagen, dz ir ein yegliche creatur in kurzen zeiten wöllen leeren schreiben vnd lesen, so seind die herren von der vniuersitet hie vnd wöllen euch einen iungen esel in die leer thun, trüwen ir in auch zu leeren. Er sprach ia, aber er müst zeit dazu hon darumb so 15 es ein vnredlich vnd vnuernünfftig creatur wer. Das wurden sie mit im zu Friden vff .XX. iar. Vlen Spiegel gedacht vnser ist drei, stirbet der Rector, so lig ich frei, stirb dann ich, wer wil mich manen, stirbt dann mein discipel, so bin ich aber ledig, vnd name das an. vnd galt fünff .c. alter schock das zu thun. Des gaben sie im etlich gold 20 daruff. Also nam vlen Spiegel den esel an, vnd zog zum Tornen in die herberg, da zu der zeit was ein seltsamer wirt. Also bestalt er einen stall allein für seinen schüler, vnd oberkam ein alten psalter, den legte er im in die kripff, vnd zwischen ieglichs blat legt er haberen des ward der esel innen, vnd warff die bletter mit dem maul umbher, 25 umb des haberns willen, vnd so er dann kein habern mehr fand zwischen den bletteren, so rufft er. J. a. J. a. Da vlen Spiegel das merckte, von dem esel, da gieng er zu dem Rector vnd sprach, Herr der Rector wann wöllen ir eins sehen, was mein schüler macht. Der Rector sprach. Lieber magister will er sich der leere auch annemen.

30 Vlen Spiegel sprach. Er ist vß der maßen von grober art. Vnd ist mir seer schwer in zu leeren. Jedoch so hab ich mit grossen fleiß vnd arbeit darzu gethon, das er etlich buchstaben, vnd sunderlich etlich vocal kant, vnd nemmen kan. Wöllen ir so gon mitt mir so sollen ir das hören vnd sehen. Also hat der gut schüler die zeit gefastet, 35 bis vff drei nach mittag. Als Vlen Spiegel nun mit dem Rector vnd etlichen magistri kam, da legt er seinem schüler ein nüm buch für. So bald er das in der kripffen fand, da warff er bald die bletter hin vnd her, der habern suchen, als er nüt fand, da begunde er mit lauter stym zu schryen. J. a. i. a. Da sprach Vlen Spiegel. Sehen 40 lieber herr die zween vocal J. und A. die kan er iezund, ich hoff er sol noch güt werden. Also starb der Rector in kurzen zeiten, darnach verließ vlen Spiegel seinen schüler, vnd ließ in gon, als in sein natur vßweißet. Also zog vlen Spiegel mit dem vffgenomnen gelt hinweg, vnd gedacht solte die esel zu Erdtsford all weiß machen, das würd viel 45 leitß bruchen, er möcht es auch nitt wol thun, vnd ließ es also bleiben.